

楚氏新平堂四修族谱序言

古昔先王设教，首重人伦，孟子曰“人伦明于上，小民亲于下。”于以覘政治之清明，风化之醇美。中国自开国以来，其间或治或乱，皆可以此卜之矣。且中国之立与夷狄异，夷狄有种而无族，中国即族以为种，故人伦之重有如衣服饮食之不可去。

近世欧风东渐，法制崇新，昧者不察，尤复变本加厉，思欲并此而去之，奚可乎？孙中山提倡革命，引四万万人为同胞，盖欲团结中国之人心而非废除家族制度以置人伦于不顾。尝考其三民主义一书，对于中国民族之构成而必以宗族为基础，尤谆谆致意于固有道德之保存，一代伟人其识固超人一等矣。

夫国者家之积也，齐其家正以治其国，故曰：国之本在家。因窃思夫穷变通之理势固然。唯其中有本末焉，有可否焉？典章文物百工技术，因时制宜，去旧从新，所谓可变革者也；礼义廉耻，人纪天纲，四维废弛，蕴乱召亡，所谓不可变革者也。

今宗法既废矣，其一族之中所赖以整齐联属之者，厥惟祠堂与谱牒也。唯此方能使之敬宗收族，以敦其本；使之尊卑长幼以明其分；使之患难相顾疾病相扶，婚嫁相庆，死丧相吊以联其情；使之济贫兴学以正其教养之道。其有不率者裁之以礼

或绳之以法，教之诲之使之改过而迁善。当此丧乱狺狺之际而民间常有以自持者，其在斯乎？其在斯乎！今之为政者，如欲矫正流俗，其必赖乎此也。

吾族谱牒早拟续修，乃因倭寇陷湘，故尔中止。兹者国土重光，百废待举，吾族人深虑逝者日远、生者日蕃、聚者日散难以稽考。原于本年二月公决续修，当时派定各房年长明理者，调查丁口造册入祠。于四月设局，由本局同仁查阅校正，其间有与草谱不合者；有与草谱合而正谱不合者；有因沦陷逃散或出征未归而其亲属不详其生年者；有多年贸易远方之无音信函电催询迄无答复者；种种弊端不一而足。旋即邀请合族长老到祠质证按实查明予以更正。至于一时无法确定者仍按其世次编入，以备其子孙日后归宗。稿既成犹恐错误，又将此稿分发各房首长，挨户查对，然后编定格式，逐一缮正校阅。四月稿凡三易，始克付梓，同人等审慎再三，岂敢云斟酌尽善，然自问亦可告无罪于祖宗也。

兹当谱牒告成，特举其人伦之大，为国家兴亡之所系，亘古今而不敝者，吾族人笃叙而其勉之，是为序。

中华民国三十六年丁亥国历十一月一日，四修谱局谨志。

楚氏二十一世文伴五奇翻译整理

20191210

一修族譜序（一）

余尝流览世家宗族，势散者使之萃，惟谱以收之；情疎者使之亲，惟谱以联之；违道者使之正，惟谱以振之；谱之为义大矣哉。吾家祖籍凤阳先明成祖公叨世袭，端祖始授襄阳卫百户复除长沙千户，累代簪纓，生于星沙长于星沙，遂于星沙居焉。尔时祖业颇饶，长善潭阴均有基业，籍贯四邑衣冠不替。迨圣朝定鼎时，叔祖白玉公得授陕西扶风县令，而祖父伯叔兄弟叨科列序者亦复不少。

迄今善邑学宫基地实皆吾祖捐助。乾隆四十四年己亥尚且具呈建碑案存府科，至若其他一切事实诸引悉之，余自无庸复赘。由此思之，正所谓如族人繁衍情疎势散，原立一谱未经刊刻恐久失传，故今稍积余资请工刊刷，以授众房庶，世远年湮将谱一览，某为某公之子某为某祖之孙而疎者可亲，散者可萃，违道者亦可克自振拔矣。

一谱之微其为功于当前，以及奕穰于不小云，是为引。

乾隆三十四年己丑桂月

十二世孙楚濬识

一修族譜序（二）

夫家譜之修由來久矣，有譜則世系清，有譜則名分肅，有譜則恩義篤，有譜則紀律嚴，雖世遠年湮支繁派盛，某祖某宗某子某孫驟難記憶者，有譜則一日而知，譜之為義不精以約而重以周哉。

乾隆五年庚申歲，余與祿遇兄讀書於聚秀堂間，一道及每憾吾家譜牒之未修也，迨至中天節歸碎葛泛酒共慶太平，住會父坐，小子與胞兄垂典隅立庭訓畢，忽及譜事，詢共淵源，父示之日：

“吾家溯自顓頊開支，遞傳至周，熊繆受封芊姓，慶衍封于楚地，遂以為氏，始都南陽郡，歷枝江新平各邑，秦漢以後，其間名垂青史者，實繁有徒繼徙江南穎州穎上縣，當年譜牒未嘗稽考，其來由至我始祖成公，（他）少習戎伍，洪武時，官鷹陽衛百戶加授昭信校尉。明太祖每親征，未嘗少離。至征帖木兒奮力陣亡，謚武烈將軍。長子大祖端公襲授承信校尉襄陽衛管軍百戶。至洪武二十九年丙子，升除長沙衛千戶，遂于星沙居業焉，迄今長善巴陰皆一本之所自出也。爾今談及譜牒，余

于康熙五十三年甲午与尔叔祖永炽公业经创始有序可稽。今尔等复继志焉，不惟为宗祖增光，余亦毕乃愿矣。予小子敬听之，下心愈殷而意弥切。”

越数日，有叔伯然泽远兄作舟华岳闻弦等来斋以修谱告，命与，禄遇兄撰之共襄厥成。予两人遂于父大人处请其编次昭穆复于斋中。不一月而草稿已就，此非先灵之助，其能不日而成哉。

自今以后，世系清名分肃亲疎内外无不联络而维系之，以笃恩义，以严纪律，夫何虑世远年湮支繁派盛难以记忆耶。精矣哉有斯谱重矣哉有斯谱。予小子撰修之余敬以志之云。

清乾隆五年岁在庚申孟夏月谷旦

十三世孙邦伦清若氏识

一修族譜序（三）

人之有祖如木之有根水之有源。苟不为之联宗睦族追远报本，譬之伐根以求枝茂，塞源而欲流长，其可得夫。故必修谱牒立祠宇省坟墓，则宗可联本可报。根之深者其枝自茂，源之远者其流自长也。

吾族以国为氏，其自颛顼以至熊绎，史书记载亦极详矣。厥后汉唐及宋世代绵远难以细察。战国时有赵襄子家臣名隆宋，有官至枢密名昭辅以逮氏谱所注等名占号而已，至本朝陕西有名文景为戊辰科进士，永州府永兴县以才等多登武榜，贤书阅其殊卷谱系，自宋而起亦属民籍。凡此虽同为一姓至欲问其同源分派有难明矣。

始祖成公原籍江南凤阳府颍州颍上县人，先充明太祖安阳总管，后进京听调除鹰阳卫世袭百户，勅命昭信校尉调征陕西华州帖木儿阵亡，子二嫡长男太祖端公袭授襄阳卫百户，后调征有功除长沙卫千户勅命承信校尉。后终明朝代荫世袭。至永乐二年甲申因军丁繁衍奉旨给以牛种下屯。五世祖琳与亲弟珣屯田长善阴潭正米四十八石，后因晚明世变各思矢志，琳泉珣

之子孙迁于善长式微，有不可考。端弟贤迁于潭。是以成公一人之裔星耀棋布于四属焉，此稽诸光绅供状。

我祖永炽公所笔谱牒册籍并访诸善潭而得者也。

龙自幼肄业，每一念及吾祖永炽公与叔哲菴有志谱牒未就未尝不废书三叹。乾隆五年庚申岁，馆于家塾聚秀堂与肄业堂弟清若间一谈及其志，殷然复有叔伯然、泽远兄、作舟、华岳、闻絃等从而和之，龙捐供应日与清若以创就谱牒焉。至落成公同祀祖日众族量家捐资生息。十八年癸酉岁因价置县城迎秀门周氏屋以为祠宇，二十一年丙子岁至善邑田心桥、小吴门、长沙螺丝山竖立坟墓碑石，前后约费三百余金。凡兹不过择其紧要历历创就而已，至谱牒付阙梨枣，祠宇重兴构造，祀田广为置买，则又俟诸异日尊祖敬宗睦族联宗之肖子贤孙焉。且成公自凤阳府发迹以前，其地或有谱牒殊未可知，远至其处访其故土，问其族属省其坟墓，则亦俟诸异日身荣名显追远报本之后嗣焉。斯时也有谱牒世系昭然，有祠宇祖灵聚然，有碑记坟墓较然，此固龙等毕生之心思精血以待后之谅，予鄙衷者以补其不及云尔。

清乾隆二十八年癸未仲夏月

十三世孙邦龙禄遇氏熏沐敬书于聚秀堂

一修族譜序（四）

余尝读韩文公文，莫为之前虽美弗彰，莫为之后虽盛弗传。思及吾家先后相续之际，未尝不三致意焉，所幸乾隆五年庚申夏得胞伯伯然族伯泽远族兄作舟相为领袖捐资积粟，尤赖族伯哲菴既族兄禄遇钦若始立草谱，迨至七年壬戌仕今族兄得拾芹香，余亦名列成均，每念落成刻费莫及，不意三十年乙酉春仕今兄即世年延未就，三十三年戊子冬，因钱谷稍丰与堂弟发魁既族众共商，命族侄廷锡族侄孙司庠纂修家乘，冬余得成草帙至三十四年己丑夏付诸梓行，是谱前无可稽，不敢率意，后有可述，因其实事务使长江之水滴滴寻源，千仞之木叶叶归根，彼遥遥华胄之讥妄拜汾阳之耻，吾知免矣。然此特为之基耳，所望后贤继志，教耕教读且勤且俭，重修祠宇。培植坟茔，三十小修，六十大修。而我祖宗亦默为庇佑，大启后人所欣慕焉，是为序

清乾隆三十四年己丑岁仲夏月

十三世孙太学生邦瑾玉哉氏识

一修族谱序（五）

闻之缙绪承业，燕冀攸长，崇德报功，孝思弗匮。欲念本支百世不易，当更忆祖宗创业维难。上兄弟六人行列居次，才浅学疏，不获展壮志以光前烈，而于谱之镌久有志焉，先大人辞世后意欲迁居城市，适房叔玉哉倡买祠于仰高山之东，上徙居奉祀有是奔走劳苦心余力歉，至今年力就衰尚不更事，岂可以谱之修明为犹有待耶，缅维我始祖成公大明盛世尽心竭力忠忱格天，明太祖溢为武烈将军，子孙代荫世袭，迄今自祖伯玉公后贤智希出莫继簪纓，清夜独旦之余，每抚心长叹亦粵。我祖缙公家资数万，利物济人，乡党咸沾实惠迄今。自叔玉哉发魁外丰者少而歉者多，兰箱有愧，寤寐自思之下我楚姓之子孙其竟忘木本水源之思乎，何为使余志之不获遂也，即我合族祖若叔弟辈秉公仗义成美成功而内顾，我生究无足录曷克本敬祖之心而成收族之举乎？第已往虽不可追而经始实为盛事。去岁叔王哉偕族弟命圭以镌谱之说商于余共为成事，余不禁慨然曰：“是余之志也乎，是余之志也乎！”于是至今春付之梓，人不数月而功成焉，夫曩时之有志未逮而竟有怀而遂就，夫非力余于财，虽力不成力佐以财，何难迅成哉。嗟嗟天下敦本之任苟今有受之昔，后有以受之。今日传而日宏其绪则族愈大，而人愈繁家愈隆。故历序其由录其所自，倘后嗣贤达永昌奕叶是不没，余之素心也乎。

清乾隆三十四年己丑岁孟冬月

十四世孙廷上建乃氏识

一修族譜序（六）

古重宗法，宗法明则天地有经，礼乐有本人心固，风俗醇而万物和，宗法废而重谱图，谱图者宗法遗也。别子为祖继别为宗继祢者。为小宗五世而迁亲尽也，上杀下杀旁杀，观于谱而可知也。百世不迁恩犹存也，万物本乎天，人本乎祖，虽累百世观于谱而无不可知也。故谱图者所以尊祖敬宗次世系别支派辨昭穆明亲疏防范同异，秩宗申之序，厚一本之恩仁义之源生，人之大道也，顾无以开其先，何以考订畴昔，无以续于后，何以备载目前。

乾隆五年庚申夏胞伯禄遇与族伯清若已有吾家旧帙之修，断自成公为始祖，其上之不可考者，不以富贵而远引旁牵，其下之同出一源者，不以寒贱而弃置弗载，诚而敬爱而有礼志苦而恩深，仁人孝子之用心固如是也。

犹忆二十一年丙子夏，先大人与族叔海瞻族伯维丛、似华、有條同往长善竖立祖墓碑归谓予小子曰：“夫碑者所以记祖宗之名号也，碑立而坟墓较然可无侵袭之患，但家乘任属草稿愿此

日付诸剞劂，俾各房分领庶有流传于无穷耳。”不幸三十年乙酉春先大人即世，有志未遂呜乎痛哉，言犹在耳中，心藏之何日忘之，三十三年戊子锡馆族叔玉哉、发魁家冬至祀祖日以修谱命锡与族侄司庠二人，余二人同质之伯父，伯父曰：“十三世以上悉仍其旧无或窜赘，十三世以下补其缺漏慎勿遣诬”。因而重修之，纪其生娶注其卒葬，其有嘉言懿行鸿才博学即为之核实表扬，以不歿其生平，俾后之览者莫不油然而生其向善之心殷然而动其好学之意，其亦庶乎继前人尊祖敬宗之志而无贻误于后人也夫。

清乾隆三十四年己丑岁季夏月朔日

十四世孙府庠廷锡命圭氏敬书于乘风斋

一修族譜序（七）

楚氏本芈姓，自鬻熊封楚其后以国为氏，时有楚邱介节正词老而益壮，战国时有楚隆为赵襄子家臣，宋有楚昭辅字拱宸官至枢密使，神宗朝有楚建中与文富诸公为洛下耆英会，如楚衍通四声字母妙九章算经明相法善推步，楚执柔字秉中授江阴县丞，尝治横河市墩水大利农田，是余楚氏历代相传流芳今昔不乏人矣。尝访郴州永兴县祖友闻宋绍兴五年登解元官至国子监祭酒，民籍落业根深枝茂椒蕃庆衍。

我始祖成公原籍直隶凤阳府颍州颍上县人，先充安阳总管，洪武初授流官职事征进华州帖木儿阵亡，长子端袭职襄阳功升长沙，次子贤迁于潭为潭始祖。

居湘阴者则端后琳之子孙也，盖自迁阴以来瓜瓞绵绵，使谱牒弗修源流失考岂非人生之大憾乎。乾隆五年庚申岁，吾祖作舟公与族众会叔祖禄遇、清若、秉兹、金管不惮跋涉谘询肇修草稿，因而一本之情弥觉殷然，有非山川之所能间者。三十一年丙戌，余祖偶疾未痊，私相悼叹，惟以宗谱未克付诸剞劂，

淳淳致囑余父，体先人志意惧忝世德，三十三年戊子冬，户首房长以修谱命族叔命圭与庠二人，余二人唯其命爰取族叔祖撰修之稿，细阅详究繁者删缺者补，准欧谱之遗制，自成公以下图其世系條贯而缕析之，附以传注，鳞次而栉比之其生娶卒葬名业居址，信者传之疑者缺焉，嗣是而后昭穆较若列眉派系明如指掌，雍雍肃肃秩如霁如。惟冀吾族之子孙颂棻之本饮水思源，尚念始祖之培植列祖之诒谋。其在家也以读书力田为其本，其立朝也以清廉仁惠为心，则异时门闾昌大，谱牒之增重者远矣。

清乾隆三十四年岁次己丑孟夏上澣

十五世孙司庠学周氏识

一修族譜序（八）

昔杜氏云：忠孝吾家之宝，经史吾家之田。盖谓功德著于往昔者存乎祖，欲法祖以修德者系乎孙。

銓忆幼时受业仕今叔祖三载，彼其早岁登名守青衿之分而修身齐家卓卓可法，至于学问则曹之仓而武之庠，文章则宋之月而谢之风。尝提耳以诲余曰：吾家厥初生民以国为氏，其间之支分派别可考而知而明礼载祀馨香断始于成公。（成公）明太祖时为昭信校尉，以死勤事，谥为武烈将军，长子端公世袭襄阳百户，因调征有功，升长沙千户后终，明朝代受恩荫而竭忱报主，异世同归，所谓拍案英雄不坠勋业于将门者也。传至昭代尔高祖咸一公槐分一座已贮药笼之参苓而终身，懋勉只欲利物利人，作种种阴功，不愧兰箱纪索，行时时方便何必柏台书名其在于今。吾有志而未之逮，不求有功先求无过，敢云日有三善哉。銓此时尚草角嬉戏不识有尊祖敬宗之大为仁人孝子之所用心也，故仕今公每日谆谆竟未询及迁阴始于何祖，更有叔祖玉哉处世则存天理顺人心，在家则事亲以孝敬，训子以义方

凡有格言无不钦为著龟，夫如是岂不与咸一公仕今公并美哉。前岁往潭邑联宗，俾成公之箕裘疏者有以戚之远者得而联之，即在宗人亦晓然于成公之流泽长矣。不诚得古人仙源积庆之圃并通属籍玉牒金花之轴世笃宗明者乎。因以迁潭迁善迁阴之祖为铨溯厥源流，始知成公次子贤公迁谭为潭始祖，珣公之子孙迁善为善始祖而衍成公之裔于阴者实发祥于琳公之子孙。吾闻德盛者后必昌功懋者报亦厚，以成公之丹心贯日，论其功不在二十八人之下，论其德宜列七人之中，惟我琳公恪守前徽垂裕，后昆故其济济克生或以功著以德著者有之，迄今追思何莫非琳公继成公之功德所致哉！且夫水有源木有本，古人置书称雅遗笏溢贞尚深显微阐幽之意，况今纂修谱籍前辈俱勒宏章，铨何敢更出机杼以卑逾尊耶，承诸父老之命，追前人之功德以达其得闻于仕今公玉哉公之诲云尔。

清乾隆三十四年己丑岁孟夏月谷旦

十五世孙司铨史衡氏识

二修族谱序（九）

夫谱之修由来久矣，上以纪祖宗之世系，下以联子孙之综分。敦本敬宗齐家睦族端在是焉。吾家老谱先大人有联宗之意，前往长善湘潭溯其源流，俱皆一本之亲，奈湘邑族寒，仅辑湘邑一支所自出焉。

乾隆三十四年己丑编采纂修告厥成功，议定嗣后三十年小修六十年大修，庶几子孙百世历历可考。不意道光四年甲申秋，伯举兄弃世，闻之不觉潸然泪下，有怀不寐忧心如熏。至冬至祀祖日，族弟友昆玉成慎周闻德万照开来天成共商伯举兄业经去世，大修之期已至，数典无可或忘，本年春族众以重修之任委余与侄司瑛瑛云。侄才疎学浅，全仗叔父大人指示等语。

窃念伯举兄管理公事数十年，毫无私意，上可以对宗祖，下可以对族人。今日重修谱牒，不过继先人之志以导共流，溯其源成一家之信史，岂敢再三推委。于是协力同心，遂仿旧谱程式传信阙疑，逐一纂阅，以授诸梓以葺厥事，俾后之览。是谱者，辨昭穆明继序，孝悌之心自是油然而生，不胜欣幸云尔，是为叙。

清道光五年乙酉岁桂月既望

十四世孙廷书桂华氏既

十五世孙司瑛周爵氏均识。

小修族譜序（十）

余尝博览周世之邱宗老而益壮，宋时之昭祖介而不私，未尝不叹先世之遗风而后人媲美者乎。自明迄清数百年人才叠出尚有继其风夫，与其尚论先人而不为之尊祖敬宗收族，徒足为先人唾而不足以绍先人休，又何能验知木本水源胥归于后。绍其家风则谱之为义昭昭也而可率略乃事欤。道光乙酉年，有劳先大人修安得不怀先大人意，而纲之纪之采之辑之聊其远而使之近，合其疏而使之亲。以自成一家之信史与先人博洽可风者。余慨慕久之而冀有其人以志同好也。故尝与神峰兄赞襄其事以毕平生之愿，俾得后之不失其传。不意丙辰秋兄弃世有志未逮耿耿于怀。幸有族侄森吾明南以小修之期间余，余阅其词实而心窃慕其事焉，跃起而续明其旧纂辑其新，令派衍支分靡有缺略之憾，左昭右穆自无次序之讹，然后知异日大修之纪足征有典，有则贻厥孙谋无党无偏，绳其祖武其或子孙有能显达者重加纂阅，协力同心传信厥疑，详略互见庶几时殊世易得有可稽，代远年湮以垂不朽云尔。

清咸丰八年戊午仲冬月上干谷旦十五世嗣孙

贡生册名人俊派讳司韶琴铿氏 谨撰

三修族谱序（十一）

吾家谱牒肇自乾隆三十四年己丑创修，道光五年乙酉续修，至咸丰八年戊午冬府君琴铨公与族兄森吾明南又会修草牒，续明其旧，汇葺维新次序攸分昭穆弗紊。迄今二十有八年矣，然稽始祖成公之事实老谱记载详明，毋庸复赘。而衍成公之裔于古罗者，其间徙居陕西四川广东既长善沅江湘潭浏阳临湘各处，均属一本之亲。老者逝而少者生代不乏人，难以罄述。惟四川更属本支，无异临湘沅江广东浏阳由琳公后以继寅公宇公之子孙所自出焉。上年冬至祀祖日族众会商录丁之事，意欲往四川以联宗，怎奈匪寇入境险阻维艰，心愈殷而力愈歉，以俟他年肖子贤孙为之遍访而采辑。

古语云，尊祖故敬宗故收族，异日之备录虽未可期，而当前之纂修要不可忽。倘非有谱以续葺之，微论坟莹叠葬，今人失考，于古人碑石倾颓后辈竟忘乎，前辈即令生年寿诞卒日忌辰问之皆茫然无以应，甚至情联亲属彼此相逢几何不等骨肉如秦越乎。

今日者，时当盛世，谱牒三修欲任重而不能，欲推卸而不

可，余虽不敏，敢不承先大人之志，意以纂其提纲汇其世系，绘其墓图，以及生卒讹谬者更之，派语之同音者易之，名目之重复者改之，兼且孝敬著于闺阁核实之，不为苛庸行见于门庭节取之，何妨恕他于各祖迁湘落业之老屋一一绘其图形，处处载芝名目。与族侄翰周赞襄谱事以授诸梓，不数月而告厥成功。是谱也，非敢谓条分缕晰远绍旁蒐要不过仿先人之旧制，遵苏式之规模，前后兼全得有可考，庶不至历久而失其传，后之览此谱者，屋图如此坟莹何虑，墓图如此山向何虑。所谓老谱所无今则增之以备其用，老谱所有今则删之以协其宜，累代相传无不知其某为某公之子某为某公之孙。即世远年淹支虽分也而派则有以合之，人虽疏也而谱则有以联之。自今以往名分正尊卑分派系较若列眉昭穆明如指掌，考其世系一本，散于万殊溯其源流万殊归于一本。由是绳绳緝緝半耕半读人家子子孙孙有干有年世第此固。予毕生之所厚望，抑亦宗祖之所默佑也夫。是为叙。

清光绪十一年岁次乙酉孟秋月上澣谷旦

十六世嗣孙太学生册名付仕派讳直正用初氏谨撰

太學生冊名時仕派諱直正用初氏謹撰

三修族譜序（十二）

橫渠張子西銘訂頑說，乾稱父坤稱母，民吾同胞，物吾與是不獨視秦越猶一家也，濂溪周子太極圖說一本散為萬殊萬殊歸一本，是不忍視骨肉如途人也，然則欲聯一族之人通以一气，辨昭穆之序敦孝弟之行，講雍睦之修譜願可忽乎哉。

我族始由十一世嫡祖永焯公于康熙年間旁蒐遠紹創修草牒一部，迄至乾隆三十四年己丑集資校對始授諸梓，續修于道光五年乙酉新旧序并称楚以国为氏。由河南转徙江南兵灾之余，谱牒散佚踵是事者，欲寻原委，必须访查江南老谱云尔。摩挲之下，心愈殷而力歉则为奈何，唯念太祖英武将军端公世袭承信校尉旋除长沙卫前千户，即以武烈将军成公为始祖以视世之强附扳援者何啻霄壤太叔祖贤公由长沙寄籍湘潭。

五世伯祖瓊公以灵官祠鸡公坡一带基址捐建善化圣宫，明成化十六年庚子迁学城南县西，复又捐其基地。以故五世叔祖珣公后裔安居善邑迄未播迁。今田心桥楚家湾楚家灞长沙捞刀河楚家湖坟塚累累，其地亦以姓氏著。明季之变，九世嫡祖光縉公始迁湘阴铜舍口，此邦衣冠文物尤为近古。而光宗公亦于是迁居套塘冲，光显公迁居黄家冲，光奇公迁居藕花塘，其子孙历由董家冲鸠居药塘冲。光縉公之长孙懋（茂）德公迁小长

沙尊阳都高桥地，方递传递衍复移大塘冲洞家塘，次孙懋科公迁居洋沙湖，唯光绅公代承世袭未知转徙何方。当时昆仲友爱甚笃，产业功名极一朝之盛，俱皆五世嫡祖琳公之嫡脉嗣。由湘阴迁四川陕西云贵广东江西湖北既浏阳沅江等处，前人以祠祭渠皆未尝一为往来，兼且远隔星散未遑遍为采辑，只得于谱中书某人迁某处，间有昧夫迁移之所者或注外迁或仅注生年，俾后来肖子贤孙循流溯源，不至拒而不纳。唯迁临湘一支每逢子午卯酉冬至会祭必来恪供祀事，因得备录世系焉。兹又阅六十年矣族之人以生齿繁衍人易世殊情疏者必使之亲势涣者必使之萃。于是辞意恳挚，率皆以三修族谱辗转相嘱，总其事基善自惭浅劣，幼年忝列胶庠馆课亦非一日，继以奏陇烽烟告警，橐笔西游十余年来遍历山川未能旁及纸墨，况值海防多事之日，往时同舟共济诸君催促之信频来，谈及谱牒自愧多让未遑推卸再三，末由获命独是谋事斯举有难焉者。

积年累月传闻异辞非有关疑存信之识则採录难；人丁散处意见各殊，非有大公无我之心则画一难；地僻户单抚育任意孤零寡偶卒葬无稽，非有循名核实之才，则搜集而区别之难；事关公项动用不无虚糜，非有量入为出之制葺事尤难，何以付族中尊长命，何以为祖辈增光。爰集议于去冬阳至用经，始于今

岁仲春幸邀先祖默佑之灵历经五月而遂竣事。是役也，录丁则有南山、在上、桂馥、席珍、月明、国宝、宣华诸翁；若而人採訪则有晴峰、既成、方来、国秦、宗铭、星源、景春、忠和、兰亭诸君；若而人正伪订舛则有延意、森吾、为贵及弟霭亭诸公；若而人司出纳慎度支则恃以道、化初两翁之力，校对成编则资梅村、蕴山、铨钰诸君之功；至于细心反复勘校修饰润色则用初翁之力居多。

唯是道光五年乙酉以后，远引近证不过坐综其成。以前或年月有误，编纪或名字有犯庙讳，派语以及凡例族约家规事关祠政不敢妄矜，月旦亦不敢泥习雷同。所有增添公私屋宇坟山图说，冠婚丧祭四礼年表碑文告示，固非喜事纷更实有，裨于身家性命绵百年屡续之绪成一姓有用之书，此则祖宗所共鉴，抑亦合族所共谅也。膺是举者例得署名简首以昭示来兹用特粗述其颠末，不敢自谓克尽厥职，但愿后之贤哲萃出，循六十年一修之例，毋阻于难成之局，毋纷于各出之言，毋因循毋偏袒毋冒滥毋讹舛，损益必协时宜，因革必归至当，继继承承引入勿替，此非独一时一人之幸也。是为叙。

清光绪十一年岁次乙酉孟秋月上澣谷旦

十七世嗣孙邑庠生榜名基善派讳道溢翰周氏谨撰